



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Vitis Aqvilonia seu Vitæ Sanctorvm Qvi Scandinaviam
Magnam Arctoi Orbis Peninsvlam Ac præsertim Regna
Gothorum Sueonumq[ue] olim rebus gestis illustrarunt**

Vastovius, Johannes

Coloniæ Agrippinæ, Anno M.DC.XXIII.

Botuidus. M.

urn:nbn:de:hbz:466:1-38534

S. BOTVIDVS MARTYR

FLORVIT ANNO CHRISTI 1100.

PASCHALI II. Pontifice,
HENRICO III. Imperatore,
INGONE IV. Rege.



G LORIOSVS Christi Martyr Botuidus, in Regno Sueciae
Prouincia Sudermaniae honestis sed infidelibus parētibus
natus, cum adhuc iuuenis esset, ne ad fruges consumendas
videretur in lucem editus, negotiationis causa in Angliam
profectus fuerat, vbi à quodam sacerdote singularis do-
ctrinae & Sanctitatis viro, hospitio exceptus, non solum mysteria fidei
Christianae didicit, verum etiam gratia baptismi accepta, in disciplina vi-
tae, & perfectionis Christianae egregie institutus est. Reuersus in patriam
gaudens, ut quondam felix ille Eunuchus, à Philippo Diacono baptis-
tus, multos Ciues suos exemplis virtutum & salutaribus exhortationi-
bus, ad eandem religionem adduxit, Domino cooperante, & sermo-
nem confirmante multiplicibus signis. Cum enim die quadam sanctus
cum familiaribus suis & vicinis ad capturam piscium progressus fuisset, & à
possessore loci illius Bouino retia laxare prohiberetur, nisi quartam pi-
scium partem sibi promitteret; pacatus vir malēs illico cedere, quam in-
anibus litigijs tempus extrahere, ad propriam insulam, quae in eodem
stagno erat perrexit, & postquam in genua procubisset, orationemq;
ad Deū supplex fudisset, famulis ut retia mitterent imperauit. Vbi quan-
ta vis eius orationis fuerit, Dominus euidenter ostendit, siquidem tanta
piscium multitudo extracta est, ut duo lembi impleti fuerint. Quod vir
Dei cum aduertisset, ad suos conuersus, Laudemus Deum inquit, qui fe-
cit caelum & terram, mare & omnia quae in eis sunt, qui etiam hoc mu-
nus nobis immeritis est largitus. Illi vero qui circa Bouini possessionem
tota nocte frustra laborarunt, virtute miraculi quod D. Botuido accide-
rat, permoti ad virum sanctum properant, & obtenta ab eo licentia, si-
mul & benedictione cymbas quoque suas piscibus replent solo Bouino
nihil in captura proficiente, iusto Dei iudicio, ut qui aemulatione minus
aqua alteri inuidisset, ipse sui fructu laboris careret. At Botuidus iniuria-
rum prorsus immemor, tam Bouinum quam ceteros omni beneuolen-
tiae significatione complectebatur. Qua sua lenitate & humanitate edi-
tique miraculi fama, tantum profecit, ut facili negotio verbis illius per-
suaderentur, sacramentoque Baptismatis initiati Christo consecra-
rentur.

*S. Botuidus dū
in Angliā ne-
gotiatur Chri-
stianus euadit.*

*In Sueciam ve-
dit multos
Christo lucra-
tur.*

*Miraculum in
captura pisciū.*

*S. Botuidus ini-
uriarum im-
memor pro
malo bonum
reddidit.*

Contigit

*Sclauum re-
demptum liber-
tateque dona-
tum in Patria
reducit.*

*Ab eodem in
insula Roggoe
occiditur.*

*Quaritur an-
xie à suis.*

*Anis candida
ductu corpus
eius reperitur.*

*Sepelitur in
Botuid-Kyr-
chia templo ei
dicato.*

*Gratiam Re-
uelationum S.
Brigitta impe-
trauit.*

Contigit autem vt Sclauum quendam queni à captiuitate redemptum ad gratiam Baptismi adduxerat, & libertate donauerat per Gothiā reditum in patriam parantem suā, securitatis causa magna charitate deduceret. Deducere autem eum statuerat in Gothlandiam, vt inde facilius ad propria remearet, Sed defatigatus itinere, ad insulam Roggoe applicuit, vbi cum post labores, ieiunia, & orationes consuetas ad Deum factas, sub arbore quadam nihil metuens quietem caperet, ab eodem ingrato homine, securi propria crudeliter trucidatus, coronam iustitiæ à Domino iusto iudice consecutus est. Cum vero parentes & familia Botuidi, propter diuturnam eius absentiam, nimium affligerentur, ac aliquid illi humanitus ea in via euenisse suspicarentur, inito consilio querere ipsum per devia sylvarum, & maritima decreuerunt. Congregata igitur multitudine propinquorum, vna cum Presbytero quodam pio Henrico nomine, cuius hortatu Dominum deprecabantur, vt quonam loco is versaretur, & si minus fortè viuum, saltem defuncti corpus ostendere dignaretur. Finita oratione, auem quandam candidam proræ nauis insidentem, & quasi ad se allicientem conspiciunt, quam velut itineris sui ductricem à Deo submissam rati, saluo ductu ad locum vbi corpus iacuit peruenēre. Quo magna omnium læticia reperto, Deo immortalī qui in sanctis suis semper est mirabilis, laudes & gratiarum actiones tulerunt, & in patriam delatū, secūdo Stocholmia miliari Sudermaniam verius honorificentissimè tumularunt. quo loco templum in honorem Martyris extructum, & ipsius de nomine Botuid-Kirkia appellatum est. Annīuersaria eius memoria die 28. Iulij peragitur. Hic in cœlis tanti apud Deum meriti vt S. Brigittæ cœlestium reuelationum, cum alijs sanctis, obtinuerit gratiam.

De eo annales Suetici & Breuiaria antiqua Reuelat. extrauag. S. Brig. c. 72.